

## TRIBINA „VEČER KUR'ANA I DŽEMATA“ U ZAGREBAČKOJ DŽAMIJI

Svaku se subotu u Islamskom centru Zagreb nakon akšama namaza održava vjerska, neki je nazivaju tefsirska, tribina pod nazivom „Večer Kur'ana i džemata“. Ovu je tribinu, na kojoj se uglavnom redom tumače kur'anski ajeti (tematski tefsir ili tematsko tumačenje kur'anskih ajeta) ali se naravno tretiraju i druge oblasti iz islamskih nauka, prije pet godina pokrenuo Mirza ef. Mešić. Osim edukacijskog karaktera tribina ima za cilj okupljanje zagrebačkih džematlija odnosno njihovo međusobno druženje koje se organizira u divanhani Islamskog centra nakon održanog predavanja i obavljenog namaza. Na tribini je dosada gostovalo i nekoliko mladih alima iz Bosne i Hercegovine koji su svojim znanjem oduševili zagrebačke džematlije.

Tako je u subotu, 15. 5., na posljednjoj tribini u ovom ciklusu, gostovao mladi alim, asistent Hadisa na Islamskom pedagoškom fakultetu u Zenici mr. Esmir ef. Halilović. Govorio je o više povezanih tema koje tretiraju nadnaravnost i Božanski karakter Kur'ana. Iako je vrijeme bilo prohladno i kišovito na predavanje se odazvao velik broj džematlija. Bukvalno se tražila stolica više, a Esmir ef. svojim britkim i jasnim argumentiranjem džematlije je držao koncentriranim više od sat vremena koliko su predavanje i prezentacija trajali. Magistar Halilović je na početku predavanja iznio zanimljive podatke o matematičkoj preciznosti kur'anskih ajeta i uopće o veličanstvenoj ustrojenosti Kur'ana. Prisutne je zadivio kur'anski reciprocitet kojeg je Halilović prezentirao kroz navođenja direktnih primjera iz Kur'ana. Tako se neke riječi i njihove suprotnosti spominju isti broj puta. Kasnije se uglavnom koncentrirao na tumačenje ajeta i hadisa koje upozoravaju vjernike i vjernice na šejtanove spletke i njegove metode navođenja čovjeka na krivi put. U tom svom konačnom cilju odvratanja čovjeka sa pravoga puta šejtan ponajviše iskorištava same čovjekove osobine/pobude koje prouzrokuju zavist, mržnju, oholost, sebičnost, ljubomoru, a koje čovjeku donose nemir u duši, zle misli i naposljetku loša djela. Ipak, kako i Allah dž.š u suri Ibrahim veli, šejtan nad pravim muminima nema nikakve (o)vlasti...stoga lijek protiv raznih fizičkih a osobito psihičkih bolesti možemo pronaći u Kur'anu. Lijek treba samo redovito uzimati, a, jasno, prevencija je najbolja...